

ՆՈՐԱՅՐԵԱՆ ՆԱՄԱԿԱՆԻ

7.

Ստոկհոլմ, 13 Ապրիլ 1898.

Մեծ. Տեղ. Միքայել Թամամչեանց,

Անցեալ տարի երբ ծանուցիք ինձ ի Ստոկհոլմ որ Լամբրոնացւոյ համար ընդօրինակեալ Խորենացւոյ Պատմութիւնը Ձեր քով կը գտնուի, մեծապէս ուրախացայ, քանզի ես անյայտացեալ կը համարէի զայդ պատուական Ձեռագիրը: Կ'ուզէ՞ք անչափ ուրախութիւն պատճառել ինձ, երեք ամսոյ համար փոխ տալով զԽորենացիդ, որպէսզի ընդօրինակեմ զայն և առ Ձեզ վերադարձնեմ: Եթէ հաճիք զայս մեծ շնորհս ընել ինձ, կարէք յղել զՁեռագիրդ առ Ռուսի Տէրութեան Պաշտօնեայն ի Ստոքհոլմ (à Son Exc. M. le Ministre de Russie, à Stockholm), զրելով նմա որ Ձեռագիրն իմ քովս (Néandre de Byzance Norayr, 15 Fredsgatan, Stockholm) պիտի մնայ երեք ամիս, և յետ երեք ամսոյ պիտի յանձնեմ զայն վսեմ. Պաշտօնեայն, որպէսզի նա ինքն հասցնէ զայն առ Ձեզ իմ ծախսով, (յայտնի է թէ ապահովագրեալ, assuré): Ինչպէս ըսի Ձեզ՝ զոր չեմ կարենեանցի բաղդատութեամբն. և որովհետեւ դիտաւորութիւնս է Խորենացւոյ նոր բնագիր մի պատրաստել և ջրել զԿարիէրի անտեղի կարծիս, մեծապէս օգտակար պիտի ըլլայ ինձ Ձեռագիրդ, և ես յանձնեմ երախտապարտ պիտի մնամ Ձեզ և պիտի յիշեմ անբաւ շնորհակալօք զՁեր անուն:

Կը յուսամ որ որդի առողջ էք հանդերձ Ձեր սիրասուն զաւակօք:

Հաճեցէք ընդունիլ, Մեծ. Տէր, զիմ խորին մեծարանաց հաւաստիս:

Խ. Ծ. Նորայր.

M. Michel Tamamchoff,

Directeur-Gérant de la Banque de Commerce
de Tiflis, Conseiller municipal de la ville de Tiflis.
Tiflis (Russie)

8.

Ստոկհոլմ, 13 Յունիս 1898.

Մեծապատիւ Տեղ. Սմբատ Շահագիզեան,

Ընկալայ զՁեր պատուական Ամառնալին նամակներն՝ զոր բարեհաճած էիք յղել առ իս, և ընթերցայ ակորով: Զուարթ և միանգամայն հրահանգիչ են գրութիւնքդ, և լի ողջամտութեամբ: Ինչ որ կ'ըսէք Տ. Խալաթեանի քննադատութեան նկատմամբ, զոր օրինակ յերեսս 40 և 67, համամիտ եմ և ես Ձեր ըսածներուն: Գեղեցիկ է նաև խորհրդածութիւնդ, 106-107, որ եթէ Խորենացի է - Թ դարերու մատենագիր է, ի՞նչպէս կ'ըլլայ որ յայդ դարերէդ էական կամ շօշափելի նշան մի թողած չըլլայ իւր Պատմութեան մէջ:

Մատուցանելով Մեծապատիւ Տեառնդ զիմ ջերմ շնորհակալիս, մնամ ամենայն յարգանքօք

Խ. Ծ. Նորայր.

M. Sembat Chahazizian
Moscou (Russie)

9.

Ստոկհոլմ, 5 Սեպտեմբեր 1898.

Մեծ. Տեղ. Լեւոն Մսերեանց,

Ընկալայ զՁեր քարտէսն Օգոստ. 1-ի, և զերկուս տետրակսն (Մխիթարեանք, և Հայ գաւառաբարբառք): Յոյժ շնորհակալ եմ: Գրաբարի մասին իմ կարծիքս միշտ այն եղած է թէ ք դարու Հայք ոչ միայն կը հասկանային, այլ և կը խօսէին պարզ գրաբար, զորոյ օրինակն տուած է մեզ Փարպեցին իւր Պատմութեամբ և Թղթով, որ գրուած են ո՛չ վարդապետի կամ վարժապետի համար՝ այլ աշխարհական իշխանի:

Խորին յարգանքօք
Նորայր.

M. Lévon Msérianz
Menchikowa Bachnia
Maison Milowanoff
Moscou (Russie)

10.

Ստեփանով, 12 Յունուար 1899.

Առ Դերապատիւ Տէր

Տէր Սահակ Եպիսկոպոս Խապայեան,

Դերապատիւ Տէր Եպիսկոպոս,

Շատ կարեւոր հրատարակութիւն մի է «Բաղդատութիւն Տպագիր Սոկրատի և Երուսաղէմի Զեռագրին», յորմէ օրինակ մի բարեհաճած էիք յղել ինձ. կը մատուցանեմ Ձեզ զիմ ջերմ շնորհակալութիւնս:

Երբ աւարտի իմ գործս Կորինթ վարդապետ եւ Նորին Թարգմանութիւնք, պիտի յղեմ Ձեզ օրինակ մի: Խնդրեմ ըսէք ինձ թէ ինչ հասցէին պարտիմ առաքել, և յերուսաղէմ թէ յերուսաղէմատունն Կ. Պօլսի: Կանխիւ ծանուցանեմ որ երկրիդ գրաքննութեան համար վնասակար պիտի նկատուի երկասիրութիւնս, և եթէ գրաքննութենէն անցնի՝ հաւանական է որ չհասնի ի ձեռքդ: Եթէ կայ ապահով ճանապարհ կամ միջոց՝ հաճեցէք ծանուցանել ինձ:

Գիտեմ յԱմսօրեայ Հանդիսէ (1894, 363 ա) որ ի մատենադարանի վանացդ կայ Տաղարան տպագրեալ ի Վենետիկ յամին 1513: Մեծապէս կը փափագիմ ունել զամբողջական ընդօրինակութիւն Տաղարանիդ, յստակ գրով, երես առ երես՝ նշանակելով զիւրաքանչիւր երեսի թիւն, ճիշտ այնպէս՝ ինչպէս է ի տպագրին: Ո՛րչափ երախտապարտ պիտի մնամ Դերապատիւ Տեառնդ եթէ բարեհաճիք կատարել զիմ փափագն: Եթէ իմ սակաւ գիտութեամբս Հայերէն գրականութեան կարենամ ունէ ծառայութիւն մատուցանել Ձեզ՝ սիրով պատրաստ եմ:

Մաղթելով Դերապատիւ Տեառնդ քաջողջութիւն, մնամ խորին մեծարանք

Խոնարհ ծառայ

Նորայր Ն. Բիւզանդացի

Հաճեցէք նշանակել գաղղիերէն զՁեր հասցէն: Իսկ իմս է Norayr de Byzance, Fredsgaton 15, Stockholm.

à Sa Grandeur Monseigneur Sahak Khabaian
au Couvent Armenien de St Jacques Jérusalem

11.

Ստեփանով, 16 Մարտ 1899.

Յոյժ Ազնիւ եւ Սիրելի Բարեկամ
Վսեմապատիւ Տէր Կ. Եզեանց,

Ընկալայ զՁեր պատուական թուղթն
Յունուար 15/28-ի:

Զունիմ զգաղղիական թարգմանութիւն Լատիվերտացոյ ի Prud'homme-է, և շնորհակալութեամբ կ'ընդունիմ զխոստացեալդ: Ընդ նմին կը խնդրեմ որ բարեհաճիք յղել ինձ (փոխ) զտպագրեալ Տաղարանն Պետրոսի Ղափանցոյ, Կ. Պօլսի, ՌՄԻԱ, զոր ունիք ի գրադարանիդ:

Նահապետի Սիրոյ Տաղերն չեմ կարծեր որ կարենան հրատարակել ի Լումայի: Գայթաղել սիրող մարդիկն հաւանական է որ դատասիւստեն զպատուականն Տէր Գիւտ եթէ նորա Հանդիսին մէջ երեւնան տափական բանաստեղծութիւններ շատ աւելի կրակոտ քան զթուղթերանցոյն, քան զԱղթամարցոյն և զՍայաթ Նովայի: Մաղթելով Վսեմական Տեառնդ քաջողջութիւն և մատուցանելով զյարգանաց ողջոյնս ամուսնիս, մնամ խորին մեծարանք

Անձնանուէր Ձեր

Նորայր.

12.

Ստեփանով, 11 Մայիս 1899.

Մեծապատիւ Տէր Ստ. Մալխասեանց,

Ընկալայ ի 11 Ապրիլ զպատուական գործդ Սեբեոսի Պատմութիւնը եւ Մ. Խորեանցի, և կը մատուցանեմ զիմ շնորհակալիս հանդերձ ամենայն մեծարանք:

Նորայր.

13.

Ստեփանով, 11 Մայիս 1899.

Մեծ. Տեղ. Կ. Կոստանեանց,

Մարտի 3-ի նամակաւ շնորհակալութեամբ ծանուցի Ձեզ որ ընդունած եմ զպատուական նուէրսդ Տաղից Գր. Աղբաւարցուն և Մկ. Նաղաւի: Խնդրեցի նաև որ բարեհաճիք յղել ինձ օրինակ մի ի նորատիպ Մասքեռոսկ Ունայեցուն, զի վսեմ. Տէր Կ. Եղեանց գրած է ինձ որ երբ պէտս ունենամ նախնեաց տպագրեալ մատենագրութեանց յեջմիածնէ՝ առ Ձեզ դիմեմ: Նոյն նամակի մէջ ընդարձակօրէն գրեցի և զՏաղից Նախապետի Խառակոյնեցուն և հաղորդեցի Ձեզ զօրինակ Տաղի նորին՝ որ կը սկսի «Ժամիկ մ'աշերուդ ի զատ երբ կացի՝ նա զիս մոռացար»: Մինչև այսօր չընկալայ ի Ձեզ պատասխան, և կը կասկածիմ որ նամակս հասած չէ ձեռքդ: Հաճեցէք տեղեկութիւն տալ ինձ, որպէս զի եթէ նամակս կորսուած է՝ պահանջեմ ի Ստեփանովի թղթաւնէն:

Խորին մեծարանօք
Նորայր.

14.

Ստեփանով, 6 Փետրուար 1900.

Մեծ. Տ. Կ. Յ. Բասմաճեան,

Ընկալայ զՓետր. 1-ի քարտեղ: Ձունիմ զգործն Tikkonen-ի. նոյն իսկ եթէ ունենայի, անհնար պիտի ըլլար ինձ կատարել զփափագդ:

Շնորհակալ եմ Բանասիրիդ Գ. գրոց: Ի Լուսայ հանդիսի (Տփղիս, 1896, Յունիս, երեսք 309-328) հրատարակած եմ զԹառաջաւան Փարպեցուն Պատմութեան, բաւական տարբեր ի Մեծ. Հ. Պարոնեանի հրատարակածէն (Բանասէր Գ. Գիրք, երեսք 267-279): Խնդրեմ ծանուցանէք զայս Հ. Պարոնեանի սիրոյ ողջունիւս կը փափագեմ որ կարգայ զայն և յայտնէ զիւր կարծիս յառաջիկայ Բանասիրի:

Պատմութիւնն Ֆրա Աւգոստինոսի (Բանասէր, Գ. երեսք 222-237) վաղ իսկ հրատարակեալ է ի Բ. Պատկանեանէ ի տետրակին Նոխարք Մասնագրութեան Հայոց,

Պետերբուրգ 1884, երեսք 5-26, վերնագրեալ. — «Աւգոստինոսի Բաղեցուն Ճանապարհորդութիւն յԵւրոպայ»:

Ամենայն մեծարանօք
Խ. Ժ. սգազգած Նորայր.

M. Basmadjian
112, Boulr. Rochechouart, Paris.

15.

Ստեփանով, 2 Ապրիլ 1900.

Մեծապատիւ Հայր Գաբեգին Վարդ.
Յովսէփեան,

Ընկալայ զՁեր պատուական նամակն Յունուար 30-ի (հ. տ.): Յառաջ քան զամենայն կը մատուցանեմ Ձեզ զիմ սրտագին շնորհակալութիւնս ազնիւ ցաւակցութեանդ համար: Կորուստս չատ մեծ է. ամեն օր ոչ այլ ինչ կը խնդրեմ յԱստուծոյ բայց եթէ զօրութիւն կրելոյ սիրով և համբերութեամբ զայն թշուառութիւն յոր ընկղմեցայ իւր ամենասուրբ կամօք:

Խնդակից եմ Մեծապատիւ Վարդապետիդ, որ Հոգեւոր Տեառն կարգադրութեամբ ստանձնեմ էք զպաշտօն խմբագրութեան Արարախ: Վստահ եմ որ ամենուս սիրելի Արարախն մեծապէս պիտի շահի՝ ունելով ի գլուխ Ձեզ նման եռանդուն և ուսումնասէր անձնաւորութիւն մի: Ի սրտէ կը մաղթեմ կարողութիւն և լիութի յաջողութիւն:

Ահա տարին բոլորեցաւ յորմէ հետէ կորուսի զսիրելիս, և ես կ'անցընեմ օրերս կիսակենդան: Երբ շնորհիւ Տեառն սթափիմ ի խոր սգոյս և կազդուրիմ, յօժարութեամբ կը կատարեմ զՁեր փափագն աշխատակցելոյ Արարախիդ: Շնորհակալ եմ մեծապէս Արարախիդ առաքման առ իմ նուատուութիւն:

Խնդրեմ ողջունէք յինէն զՄեծ. Բարդուղիմէոս Վրդ. Գեորգեան, զորոյ ընկալայ զնամակն, կը պատասխանեմ յետ աւուրց:

Հաճեցէք ընդունիլ, Մեծապատիւ Վարդապետ, զիմ խորին մեծարանոց հաւաստիս:

Խ. Ծ. սգազգած Նորայր.